

ANALISIS MORFOSEMANTIK NAMA-NAMA KAMPUNG WONTEN KECAMATAN KRATON KUTHA YOGYAKARTA DAERAH ISTIMEWA YOGYAKARTA

A MORPHOSEMANTICS ANALYSIS ON THE VILLAGES' NAMES OF THE REGENCY OF YOGYAKARTA D.I YOGYAKA

Oleh: Purwito Aji Yuwono, Prodi Pendidikan Bahasa Jawa, Fakultas Bahasa dan Seni, Universitas Negeri Yogyakarta

Sarining Panaliten

Ancasing panaliten menika ngrembag bab pandhapuking nama kampung, teges nama kampung saha dhasaring paring nama saking nama-nama kampung wonten Kecamatan Kraton Kutha Yogyakarta Daerah Istimewa Yogyakarta. Jinising panaliten inggih menika panaliten kualitatif asipat deskriptif. Data panaliten menika arupi tembung nama kampung wonten Kecamatan Kraton Kutha Yogyakarta. Sumbering data panaliten saking dokumentasi saha saking BPAD Kutha Yogyakarta. Cara ngempalaken data kanthi cara observasi, dokumentasi, saha wawancara. Data dipunanalisis kanthi cara deskriptif. Anggenipun ngesahaken data migunakaken cara validitas triangulasi sumber saha reliabilitas intrarater saha interrater. Asiling panaliten inggih menika: (1) pandhapuking tembung nama kampung saking tembung lingga dados tembung andhahan kanthi pangrimbag wuwuhan; ater-ater anuswara (n-), panambang -an saha konfiksasi pa- -an saha ka- -an, pangrimbag camboran wetah saha camboran variasi wuwuhan (-an); (2) teges tembung saking nama kampung inggih menika; tegesing nama saking pangaribawa tembung lingganipun, tegesing nama saking pangaribawa ingkang mapan wonten panggenan menika, saha tegesing nama saking pangaribawa kriya lingganipun; (3) dhasaring paring nama kampung inggih menika papan panggenanipun, saha nyebutaken memperipun.

Pamijining Tembung : Morfosemantik, Kampung, Kraton Ngayogyakarta

Abstract

The purpose of this research is to discuss the acquisition of village names, their meanings, and the basis of village-naming in the regency of Yogyakarta Palace, Special Region of Yogyakarta. The type of this research is a descriptive qualitative research. The data of the research are the names of the villages in the regency of Yogyakarta Palace. The sources of the research are in the form of documentations and the data in The Department of Regional Libraries and Archives of Yogyakarta (BPAD Yogyakarta). The data were collected through observation, documentation and interview. The data were analyzed descriptively. The data were validated using triangulation of sources, intra-rater reliability, and inter-rater reliability. The results of this research are: (1) the acquisition of the names of villages are from derivational words, which are the prefix of the nasal (n), suffix of (-an), the combination of prefix pa- -an and ka- -an, and others from the acquisition of compound words; (2) the meanings of the villages' names are obtained from roots words, who inhabits the village and verbs; (3) the village-naming is based on who inhabits the village and also the similarities with the objects around them or which they observe and experience.

Keywords: morphosemantics, village, Ngayogyakarta Palac

PURWAKA

Kampung minangka salahsatunggaling papan *sosialisasi* warganipun. Kampung setunggal saha sanesipun menika gadhah budaya ingkang beda – beda ingkang narik kawigatosan. kampung ugi minangka *gambaran sosial* saking para warga ingkang mapan wonten papan menika. Kampung saged nggambaraken *sosial* budaya saking warganipun.

Gambaran budaya saking satunggaling kampung saged dipunmangertosi saking namanipun. Nama kampung minangka satunggaling wujud *konkrit* saking tetenger papan menika. Nama kampung satemah wigati sanget dipunteliti utawi dipun*analisis*. Nama kampung dipunteliti saking pandhapuking nama kampung, teges kampung, saha dhasaring paring nama kampung satemah manggihaken gambaran saking kampung menika. Nama kampung ingkang narik kawigatosan dipunteliti inggih menika nama kampung wonten Kecamatan Kraton Kutha Yogyakarta.

GEGARAN TEORI

Morfosemantik

Morfosemantik inggih menika satunggaling sesebatan kangge panaliten bab basa ingkang migunakaken *teori morfologi* saha *teori semantik*. Tembung *Morfosemantik* piyambak kadhapak saking kalih tembung inggih menika tembung “*morfo*” saha “*semantik*”. Morfo kapendhet saking wacahan morfologi, miturut Ramlan (2001: 21) morfologi inggih menika

peranganing ngelmu basa ingkang nyinau asal-usulipun tembung sarta pangaribawa ewahing tembung saha teges tembung, morfologi ugi saged dipuntegesi ngelmu basa ingkang nyinau wujud tembung sarta ancas ewahipun tembung, saking ancas gramatik saha semantik. Wondene semantik inggih menika perangan *linguistik* ingkang neliti bab teges saha makna (Verhar, 2001: 385). Satemah saking andharan kalawau tembung *morfosemantik* saged dipunmangertosi inggih menika ngelmu ingkang nyinau bab ewah - ewahing teges kanthi adhedhasar ewah – ewahaning tembung.

Morfologi

Morfologi inggih menika *kajian* basa saking wujud tembung. *Objek kajian* morfologi wonten kalih inggih menika *kajian* tembung saha *kajian* morfem (Suardi, 2013: 28). Miturut Verhaar (2001: 97) morfologi inggih menika ngelmu linguistik ingkang *mengidentifikasi* peranganing basa kanthi perangan *gramatiakal*. Wondene miturut Nurhayati (2001: 2) morfologi inggih menika ngelmu *linguistik* ingkang magepokan utawi *mengidentifikasi* bab pandhapuking tembung.

Kanthi pamanggihipun para ahli saged dipunpendhet dudutan morfologi inggih menika ngelmu *linguistik* ingkang magepokan kalian wujud pandhapuking tembung saha ewahing tembung ingkang dadosaken ewahing teges tembung menika. Saged dipunmanertosi menawi *objek* saking kajian morfologi inggih menika tembung, wondene peranganing tembung wonten kalih inggih menika morfem saha tembung.

Pangrimbaging Tembung

Pangrimbagipun tembung linggga dados tembung andhahan dipuwastani *proses morfologis*. Miturut Sudaryanto (1991: 18) *proses morfologis* inggih menika proses pikantuking tembung mawi cara *pengubahan wujud dasar berstatus morfem* makna *leksikal* kanthi piranti *pembentuk berstatus morfem* ingkang sipatipun makna gramatikal saha kaiket. Miturut Nurhayati (2001: 10) wonten basa jawi *proses morfologis* pangrimbaging tembung wonten tiga inggih menika wuwuhan, rangkep utawi *pengulangan*, saha camboran utawi *pemajemukan*.

Semantik

Semantik inggih menika *kajian* ingkang magepokan kalian makna (Suhardi, 2013: 28). Wondene miturut Gudai (1989: 3) semantik inggih menika pangretosan bab makna. Pamanggih sanes mratelaaken bilih semantik inggih menika perangan *linguistik* ingkang nyinau bab teges saha makna (Verhar, 2001: 385). Miturut Pateda (2010: 7) semantik inggih menika *subdisiplin* linguistik ingkang mratelaaken teges saha kanthi objekipun semantik inggih menika makna. Adhedhasar saking pamanggih para ahli kasebut saged dipunpendhet dudutan menawi *semantik* inggih menika *kajian Lingistik* ingkang ngandharaken bab teges saha makna saking tembung utawi *morfem*.

Dhasaring Paring Nama

Dhasaring paring nama inggih menika bab *konvensi* utawi

prajanjen basa antawisipun *anggota* wonten masarakat (Aristoteles lumantar Chaer, 1995: 44). Miturut Chaer (1995: 43-52) dhasaring paring nama wonten mapinten-pinten cara, inggih menika; (1) Paniruning swanten, (2) Panyebuting Perangan, (3) Panyebuting sipat *khas*, (4) Panemu utawi ingkang Damel, (5) Papan Asal, (6) Bahan, (7) Ngemperaken, (8) Cekakan.

CARA PANALITEN

Jinising Panaliten

Panaliten *Analisis Morfesemantik* Nama-Nama Kampung wonten Kecamatan Kraton Kutha Yogyakarta menika migunakaken jinising panaliten *Kualitatif* ingkang sipatipun *deskriptif*. Miturut Bogdan saha Taylor lumantar Ismawati (2012: 7) panaliten *kualitatif* inggih menika jangkahing panaliten ingkang asilipun *data deskriptif* arupi tembung-tembung ingkang kaserat utawi pocapaning manungsa saha pakulinan ingkang dipuntingali; *pendekatan* menika wonten *latar* saha *individu* kanthi *holistik* (wetah), kanthi mekaten individu utawi *organisasi* boten dipun*isolasi* wonten *variabel* utawi *hipotesis* ananging dipuntingali wonten satunggaling satuan ingkang wetah. Miturut Ismawati (2012: 90) panaliten *deskriptif* inggih menika panaliten *nonhipotesis* satemah wonten jangkahing panaliten menika boten migunaaken rumusing *hipotesis*. Pamanggih sanes ngandaraken panaliten *deskriptif* inggih menika gambaran titikan *data* kanthi *akurat* ingkang jumbuh saha gadhah sipat

ingkang alamiah. *Data* ingkang dipunkempalaken saged awujud saking *naskah, wawancara, catetan lapangan, foto, video tape, dokumen pribadi, saha sapanunggalanipun* (Djajasudarma 1993: 15). Adhedasar pamanggih saking para ahli kalawau mila panaliten menika migunaaken panaliten *kualitatif deskriptif*, amargi wonten panaliten menika *data* awujud tembung nama kampung wonten Kecamatan Kraton kutha Yogyakarta Provinsi D.I. Yogyakarta ingkang ngalami *peoses morfosemantik*.

Data saha Sumber Data

Data wonten panaliten menika awujud nama kampung wonten Kecamatan Kraton Kutha Yogyakarta Daerah Istimewa Yogyakarta. Sumber *data* wonten panaliten inggih menika saking data Pemda Kota Yogyakarta (BPAD Kutha Yogyakarta) saha saking *informan* (K.R.T.H Jatiningrat S.H).

Setting Panaliten

Panaliten menika katindhakaken wonten Kecamatan Kraton kutha Yogyakarta Provinsi D.I. Yogyakarta. Wekdalipun anggenipun ngadani panaliten inggih menika kalih wulan inggih menika wulan *November* dumugi *Desember* 2016.

Caranipun Ngempalaken Data

Cara ngempalaken data wonten panaliten menika kanthi cara *observasi, wawancara saha dokumentasi*.

1. Observasi

Panaliti ngadani *surve* wonten Kantor Kecamatan Kraton,

ngempalaken *data-data* arupi sedaya nama kampung wonten wewengkon kecamatan Kraton, kathahing kampung, wates kampung, sejarah kampung. Panaliti ugi ngadani *observasi* wonten Kraton Ngayogyakarta saha *observasi* wonten kantor Badan Perpustakaan dan Arsip Daerah Kota Yogyakarta.

2. Wawancara

Wawancara katindakaken kalia *narasumber* ingkang paring *data valid*. *Informan* ingkang dipundadosaken *narasumber* inggih menika sesepuh Kraton Ngayogyakarta. *Narasumber* wonten panaliten menika K.R.T. H Jatiningrat S.H minangka Pengageng Tepas Dwarapura Kraton Ngayogyakarta Hadiningrat.

3. Dokumentasi

Dokumentasi nama kampung wonten tlatah Kecamatan Kraton kutha Yogyakarta menika pikantuk saking *data lapangan*, Kantor Kecamatan Kraton, Kantor Kalurahan saha wonten Badan Perpustakaan dan Arsip Daerah Kota Yogyakarta.

Pirantining Panaliten

Piranti sajroning panaliten menika arupi lembar *observasi* saha pandom wawancara. Data ugi dipunpanggihaken kanthi piranti sekunder inggih menika dipunbiyantu kaliyan *dokumen, saha kamus*.

Caranipun Nganalisis Data

cara *analisis data* menika kanthi *tabulasi, klasifikasi, saha interpretasi*. *Tabulasi* inggih menika nglebetaken *data* wonten *tabel*. *Klasifikasi* inggih menika milah *data* miturut jinising *data*, lajeng

interpretasi inggih menika ngandharaken utawi *penafsiran data* saking asiling panaliten. Tata urutaning *analisis deskriptif* inggih menika:

1. *data* dipunlebetaken wonten *tabel analisis Data*. Wosing *tabel* inggih menika pandhapuking nama kampung, tegesing nama kampung saha dhasaring paring nama kampung;
2. *data* dipunklasifikasikaken, inggih menika pandhapuking nama kampung, tegesing nama kampung, saha dhasaring paring nama kampung;
3. *analisis* pandhapuking nama inggih menika kanthi *data* dipunklasifikasikaken miturut wujuding tembung inggih menika mahiyaaken wujud tembung lingga utawi tembung andhahan saha pangrimbagipun;
4. *analisis semantik* inggih menika madosi tegesing nama kampung wonten Kecamatan Kraton Kutha Yogyakarta kanthi *kamus*. *Kamus* ingkang dipunginaaken madosi tegesing tembung inggih menika (a.) Baoesastra Djawa, (b.) Kamus Jawi Kina – Indonesia, (c.) Kamus Jawa – Indonesia;
5. nama-nama kampung wonten Kecamatan Kraton menika saklajengipun dipunklasifikasiaken miturut *unsur* dhasaring paring nama, kanthi *teori* dhasaring paring nama inggih menika paniruning swanten, panyebuting bagian, panyebuting sipat *khas*, panemu utawi ingkang damel, papan asal,

bahan, ngemperaken, cekakan, saha *penamaan* enggal.

Validitas saha Reliabelitas Data

Panaliten menika migunakaken *validitas semantik* kanthi cara *triangulasi sumber*. *Sumber triangulasi* ingkang dipunangge inggih menika Kamus, Pandom Wawancara, saha data Dokumentasi.

Reliabelitas Data ingkang dipunginakaken inggih menika *reliabelitas intra reter* saha *interrater*.

ASILING PANALITEN

1. Pangrimbaging tembung kanthi wuwuhan

Nama kampung ingkang pandhapuking nama kanthi pangrimbag wuwuhan; ater-ater anuswara (n-), panambang (-an), *konfiksasi* (pa- -an) saha (ka- -an) dipunrembag sesarengan kaliah tegesing nama saha dhasaring paring nama. Nama kampung ingkang ngalami pandhapuking nama, tegesing nama saha dhasaring paring nama dipunrembag wonten ngandhap menika.

a. Papan Panggenanipun

Ater-ater Anuswara (n-)

1) Kampung Ngasem

Kampung Ngasem menika nama kampung ingkang wujud tembungipun kalebet tembung andhahan pangrimbagipun sarana wuwuhan, tembung menika kadhapuk saking tembung lingga asem saha wuwuhan ater – ater anuswara N- (ng). Miturut kamus, asem menika tegesipun araning uwit

sarta uwohipun ingkang rasanipun kecut (Poerwadarminta, 1939: 20), wondene ater – ater anuswara N-(ng) gadhah teges nindakaken pakaryan utawi paring pangaribawa tembung kriya.

Tembung menika saking wujud tembung lingga Asem saha ater – ater anuswara N- (ng), pandhapuking nama saking lingga dados tembung andhahan, pangrimbagipun sarana wuwuhan ngasem. Saking tegesing nama kampung Ngasem inggih menika ingkang wiwitan asem minangka araning uwit sarta wohipun ingkang rasanipun kecut, ewah dados ngasem ingkang tegesipun nindakaken pakaryan paring rasa kecut utawi nindakaken pakaryan nanem taneman asem. Tegesing nama minangka araning tembung kriya ewah dados tegesing tembung papan panggenanipun. Miturut pamanggih narasumber nalika 21 Februari 2017, kampung Ngasem minangka papan panggenan ingkang kathah taneman asemipun.

Dhasar anggenipun paring nama kampung wonten gayutanipun kaliyan teges saking nama ngasem. Satemah saking *informan* saha kamus, dhasaripun paring nama miturut papan panggenan. Papan panggenan saking taneman asem ingkang tuwuh. Kampung Ngasem menika rumiyinipun kathah taneman asem ingkang ageng, ananging wonten jaman sakmenika sampun boten wonten. Satemah kalia para warga papan menika dipunparingi nama Kampung Ngasem, amargi dhasaring paring nama Kampung Ngasem menika miturut papan panggenanipun, inggih menika

taneman asem ingkang kathah wonten kampung menika

Panambang (-an)

1) Kampung Wijilan

Kampung Wijilan menika nama kampung ingkang wujud tembungipun kalebet tembung andhahan pangrimbagipun sarana wuwuhan, tembung menika kadhapak saking tembung lingga wijil saha wuwuhan panambang -an. Miturut kamus, wijil menika tegesipun wiji utawi mijil saged ugi gadhah teges regol, gapura utawi lawang (Poerwadarminta, 1939: 662), wondene panambang -an gadhah teges nuduhaken papan panggenan, utawi paring pangaribawa tembung verba, nomina.

Tembung menika saking wujud tembung lingga wijil saha panambang –an, pandhapuking nama saking lingga dados tembung andhahan. Tembung menika kadhapak saking wujud tembung lingga wijil, ewah dados tembung andhahan, pangrimbagipun sarana wuwuhan wijilan. Saking tegesing nama kampung Wijilan inggih menika ingkang wiwitan wijil minangka wiji utawi mijil ugi regol, gapura utawi lawang, ewah dados wijilan ingkang tegesipun papan panggenanipun wiji utawi mijil saha papan panggenan regol, gepura utawi lawang. Tegesing nama saking pangaribawa ingkang mapan wonten panggenan menika. Miturut pamanggih narasumber nalika 21 Februari 2017, kampung Wijilan minangka papan panggenanipun saking K.R.T Wijil.

Dhasar anggenipun paring nama kampung wonten gayutanipun kaliyan nama wijilan. Satemah saking *informan* saha kamus, wijilan minangka satunggaling nama papan panggenanipun saking kluwarga Kraton Ngayogyakarta Hadiningrat inggih menika K.R.T Wijil. K.R.T Wijil minangka garwa dalem G.R.A Dewi (putri Sultan H.B VII). Satemah kalian para warga papan menika dipunparingi nama Kampung Wijilan amargi dhasaring paring nama kampung menika miturut papan panggenanipun, inggih menika papanipun K.R.T Wijil

Konviksasi pa- -an

1. Kampung Panembahan

Kampung Panembahan menika nama kampung ingkang wujud tembungipun kalebet tembung andhahan, pangrimbagipun sarana wuwuhan, tembung menika kadhapuk saking tembung lingga sembah saha wuwuhan (*konfiks* utawi simulfik) pan- saha -an. Miturut kamus, sembah menika gadhah teges simbah utawi tandhaning pangaji – aji sarana nangkepake tangan ingkang kapener jempol kagathukake irung utawi bathuk (Poerwadarminta, 1939: 554), wondene wuwuhan pan-/-an gadhah teges nuduhaken papan panggenan, utawi paring pangaribawa tembung *nomina* utawi araning wujud.

Tembung menika kadhapuk saking tembung lingga sembah saha *konfiks* pan- -an, ewah dados tembug andhahan, pangrimbagipun sarana wuwuhan (konfiks utawi simulfik) panembahan. Saking tegesing nama kampung Panembahan inggih menika ingkang wiwitan sembah

tegesipun simbah utawi tandhaning pangaji – aji sarana nangkepaken asta ingkang kapener jempol kagathukake irung utawi bathuk, ewah dados panembahan ingkang tegesipun papan panggenan simbah utawi papan panggenan kangge paring tandhaning panaji – aji sarana nangkepake tangan ingkang kapener jempol kagathukake irung utawi bathuk. Tegesing nama saking pangaribawa ingkang mapan wonten panggenan menika. Miturut pamanggih narasumber nalika 21 *Februari* 2017, kampung Panembahan minangka papan panggenanipun saking Gusti Kanjeng Panembahan Mangkurat.

Dhasar anggenipun paring nama kampung wonten gayutanipun kaliyan nama Panembahan. Satemah saking *informan* saha kamus, panembahan minangka satunggaling nama papan panggenan saking Gusti Kanjeng Panembahan Mangkurat (putra dalem Kanjeng Sultan Kraton Ngayogyakarta Hadiningrat H.B II). G.K Panembahan Mangkurat rumiyinipun manggen wonten papan panggenan ingkang samenika dados kampung Panembahan. Satemah kalian para warga papan menika dipunparingi nama Kampung Panembahan, amargi dhasaring paring nama Kampung Panembahan menika miturut papan panggenanipun, inggih menika papanipun Gusti Kanjeng Panembahan Mangkurat (Putra dalem Kanjeng Sultan Kraton Ngayogyakarta Hadiningrat H.B II), dhasaring paring nama adhedhasar papanipun.

Konviksasi ka- -an

1. Kampung Kadipaten

Kampung Kadipaten menika nama kampung ingkang wujud tembungipun kalebet tembung andhahan, pangrimbagipun sarana wuwuhan, tembung menika kadhapuk saking tembung lingga Adipati saha wuwuhan (*konfiks* utawi *simulfik*) ka- saha -an. Miturut kamus, adipati menika gadhah teges Ratu utawi sesebutan Bupati mancanegara sarta pepatih Dalem wonten Kraton Surakarta saha Ngayogyakarta (Poerwadarminta, 1939: 2), wondene wuwuhan ka-/-an gadhah teges nuduhaken papan panggenan, utawi paring pangaribawa tembung *nomina* utawi araning wujud.

Tembung menika kadhapuk saking tembung lingga adipati saha ka- saha -an dados tembug andhahan, pangrimbagipun sarana wuwuhan (*konfiks* utawi *simulfik*) kadipaten. Tembung adipati menawi pikantuk wuwuhan ka- saha -an menika boten ewah dados tembung kaadipatian ananging ewah dados tembung kadipaten, amargi aksara swara (vokal) a saha a menika luluh dados setunggal swara a, saha aksara swara (vokal) i saha a menika luluh dados setunggal aksara swara e, satemah (ka-) + adipati + (-an) menika ewah dados tembung kadipaten. Saking tegesing nama kampung Kadipaten inggih menika ingkang wiwitan adipati tegesipun Ratu utawi sesebutan Bupati mancanegara sarta pepatih Dalem wonten Kraton Surakarta saha Ngayogyakarta, ewah dados kadipaten ingkang tegesipun papan panggenanipun Ratu utawi Bupati mancanegara sarta pepatih

Dalem wonten Kraton Surakarta saha Ngayogyakarta. Tegesing nama saking pangaribawa ingkang mapan wonten panggenan menika. Miturut pamanggih narasumber nalika 21 Februari 2017, kampung Kadipaten minangka papan panggenanipun saking Adipati anom Kraton Ngayogyakarta Hadiningrat.

Dhasar anggenipun paring nama kampung wonten gayutanipun kaliyan nama Kadipaten. Satemah saking *informan* saha kamus, kadipaten minangka satunggaling nama papan panggenan saking Adipati Anom Kraton Ngayogyakarta Hadiningrat. Adipati Anom Kraton Ngayogyakarta Hadiningrat rumiyin mapan wonten papan panggenan ingkang samenika dados kampung Kadipaten. Satemeh kalia para warga papan menika dipunparingi nama Kampung Kadipaten, amargi dhasaring paring nama Kampung Kadipaten menika miturut papan panggenanipun, inggih menika papanipun adipati, dhasaring paring nama adhedhasar papanipun.

Nyebataken Memperipun

1) Kampung Segaran

Kampung Segaran menika nama kampung ingkang wujud tembungipun kalebet tembung andhahan, pangrimbagipun sarana wuwuhan, tembung menika kadhapuk saking tembung lingga segara saha wuwuhan panambang -an. Miturut kamus, segara menika tegesipun seganten (Poerwadarminta, 1939: 552), wondene panambang -an gadhah teges nuduhaken papan panggenan, utawi paring pangaribawa tembung verba, *nomina*

utawi tembung aran ingkang memper dhateng tembung lingganipun.

Tembung menika kadhapuk saking tembung lingga segara saha wuwuhan -an, ewah dados tembug andhahan, pangrimbagipun sarana wuwuhan segaran. Tembung segara menawi pikantuk panambang –an menika boten ewah dados tembung segaraan ananging ewah dados tembung segaran, amargi aksara swara (vokal) a saha a menika luluh dados setunggal aksara swara a, satemah tembung segara + (-an) menika ewah dados tembung segaran. Saking tegesing nama kampung Segaran inggih menika ingkang wiwitan segara minangka aranining seganten utawi papan panggenan toya ingkang kathah saha asin, ewah dados segaran ingkang tegesipun wewujudan utawi papan ingkang memper segara Tegesing nama saking pangaribawa tembung lingganipun. Miturut pamanggih narasumber nalika 21 *Februari* 2017, kampung Segaran minangka papan panggenan ingkang memeper segara.

Dhasar anggenipun paring nama kampung wonten gayutanipun kaliyan nama segaran. Satemah saking *informan* saha kamus, dhasaripun paring nama kalebet nyebataken memperipun. Dhasaring paring nama segaran menika nyebataken memperipun saking wewujudan segara. Papan utawi wewujudan ingkang memeper segara menika wonten jaman rumiyinipun minangka papan kathah toya ingkang ageng saha wonten sambung rapetipun kalian Taman Sari, ananging wonten jaman samenika papan menika sampun dados kampung Segaran, Satemah kalian para warga papan menika

dipunparingi nama Kampung Segaran. Amargi dhasaring paring nama Kampung Segaran menika miturut memeperipun inggih menika memper kalian segara, dhasaring paring nama adhedhasar memperipun.

2. Pangrimbaging Tembung kanthi Camboran

Nama kampung ingkang pandhapuking nama kanthi pangrimbagipun sarana camboranan dipunrembag sesarengan kalian tegesing tembung saha dhasaring paring nama. Nama kampung ingkang ngalami pandhapuking nama, tegesing nama saha dhasaring paring nama dipunrembag wonten ngandhap menika.

a. Papan panggenanipun

Camboran Wetah

1) Kampung Sawojajar

Kampung Sawojajar menika nama kampung ingkang wujud tembungipun kalebet tembung andhahan, pangrimbagipun sarana camboran, inggih menika camboran wutuh. Tembung camboran wutuh sawojajar menawi dipunudhar tembung menika kadhapuk saking tembung lingga sawo saha jajar. Miturut kamus, sawo menika tegesipun araning uwit sarta uwohipun (Poerwadarminta, 1939: 549), wondene jajar tegesipun jejer lelarikan, sababag, pada pangkate (Poerwadarminta, 1939: 76).

Tembung menika kadhapuk saking tembung lingga sawo saha jajar, ndapuk tembug andhahan, pangrimbagipun sarana camboran saawojajar. Tembung sawojajar

menika kalebet jinising tembung camboran wutuh, tembung jajar minangka katrangan saking tembung sawo. Saking tegesing nama kampung Sawojajar inggih menika ingkang wiwitan menawi sawo tegesipun araning taneman sarta uwohipun saha jajar tegesipun jejer lelarikan, sababag saha padha pangkate, wondene sawojajar tegesipun taneman sawo ingkang jejer lelarikan. Tegesing nama saking pangaribawa ingkang mapan wonten panggenan menika. Miturut pamanggih narasumber nalika 21 Februari 2017, kampung Sawojajar minangka papan panggenan ingkang wonten taneman sawo jajar lelarikan.

Dhasar anggenipun paring nama kampung wonten gayutanipun kaliyan teges saking nama sawojajar. Satemah saking *informan* saha kamus, dhasaripun paring nama miturut papan panggenanipun. Kampung Sawojajar menika rumuyinipun kathah taneman sawo kecil ingkang dipuntanem kanthi jejer lelarikan, dumugi samenika taneman sawo kecil menika taksih wonten saha lestantun. Satemah kalia para warga papan menika dipunparingi nama Kampung Sawojajar, amargi menika dhasaring paring nama Kampung Sawojajar miturut papan panggenanipun, inggih menika papan panggenan saking taneman sawo kecil ingkang jejer lelarikan.

2) Camboran kanthi *Variasi*

Wuwuhan (-an)

1) Kampung Kemitbumen

Kampung Kemitbumen menika nama kampung ingkang

wujud tembungipun kalebet tembung andhahan, pangrimbagipun sarana camboran, inggih menika camboran wutuh. Tembung camboran wutuh kemitbumen menawi dipunudhar

tembung menika kadhapuk saking tembung kemit, bumi saha panambang -an. Miturut kamus, kemitbumi menika tegesipun abdi dalem ingkang pinatah resesik, ngangsu saha sapanunggalanipun (Poerwadarminta, 1939: 206), wondene panambang -an gadhah teges nuduhaken papan panggenan, utawi paring pangaribawa tembung verba, nomina.

Tembung menika kadhapuk saking tembung lingga kemit, tembung bumi saha panambang -an, ndapuk tembug andhahan, pangrimbagipun sarana camboran kemitbunen. Tembung kemitbumen menika kalebet jinising tembung camboran wutuh mawi *variasi* inggih menika kanthi panambang -an. Tembung kemitbumi menawi pikantuk panambang -an menika boten ewah dados tembung kemitbumian ananging ewah dados tembung kemitbumen, amargi aksara swara (vokal) i saha a menika luluh dados aksara swara e, satemah tembung kemitbuni + (-an) menika ewah dados tembung kemitbumen. Saking tegesing nama kampung Kemitbumen inggih menika ingkang wiwitan kemitbumi minangka araning abdi dalem Kraton ingkang padamelanipun resesik, ngangsu saha sapanunggalanipun, wondene kemitbumen ingkang tegesipun papan panggenan abdi dalem kemitbumi. Tegesing nama saking pangaribawa ingkang mapan wonten panggenan menika. Miturut pamanggih narasumber nalika 21

Februari 2017, kampung Kemitbumen minangka papan panggenanipun saking abdi dalem Kemitbumi Kraton Ngayogyakarta Hadiningrat.

Dhasar anggenipun paring nama kampung wonten gayutanipun kaliyan nama kemitbumen. Satemah saking *informan* saha kamus, kemitbumen minangka satunggaling nama papan panggenan saking abdi dalem Kraton Ngayogyakarta Hadiningrat inggih menika abdi dalem kemitbumi. Abdi dalem kemitbumi pakaryanipun resesik, ngangsu lan sapanunggalanipun wonten Kraton Ngayogyakarta Hadiningrat. Abdi dalem Kemitbumi menika rumiyinipun mapan wonten papan panggenan ingkang samenika dados kampung Kemitbumen. Satemah kalia para warga papan menika dipunparingi nama Kampung Kemitbumen, amargi dhasaring paring nama Kampung Kemitbumen menika miturut papan panggenanipun, inggih menika papanipun abdi dalem Kemitbumi, dhasaring paring nama adhedhasar papanipun

DUDUTAN SAHA PAMRAYOGI

Saking asiling panaliten saha pirembaran ingkang sampun dipuntindakaken, panaliten menika saged dipunpundhut dudutanipun kaandharaken wonten ngandhap menika:

1. pandhapuking nama kampung wonten Kecamatan Kraton Kutha Yogyakarta inggih menika saking tembung lingga dados tembung andhahan kanthi pangrimbag wuwuhan; ater-ater anuswara (n-), panambang –an saha *konfiksasi* pa- -an saha ka- -an,

2. pangrimbaging tembung wonten ugi kanthi camboran wetah saha camboran *variasi* wuwuhan(-an);
2. teges saking nama kampung wonten Kecamatan Kraton Kutha Yogyakarta kaperang dados tiga, inggih menika; (1) tegesing nama saking pangaribawa tembung lingganipun, (2) tegesing nama saking pangaribawa ingkang mapan wonten panggenan menika, saha (3) tegesing nama saking pangaribawa kriya lingganipun;
3. dhasaring paring nama kampung ingkang pangrimbagipun sarana wuwuhan wonten kalih dhasar paring nama, inggih menika papan panggenanipun, saha ngemperaken. Dhasaring paring nama kampung ingkang pangrimbagipun sarana camboran inggih menika papan panggenanipun.

Pamrayogi

Adhedhasar asiling panaliten saha dudutan kalawau wonten perangan menika panaliti badhe suka pamrayogi, pamrayoginipun inggih menika:

1. kangge masyarakat umum mliginipun warga Kecamatan Kraton, teges saha asal usulipun (sejarah) kampung kedah dipunmangertosi, supados saged nguri-uri, nglestantunaken saha majengaken kampung minangka kampung wisata;
2. kangge Dianas Kebudayaan saha Pariwisata, saged paring pambiyantu awujud piranti ingkang dipunbetahaken kalia kampung-kampung wisata wonten Kecamatan Krataon

- Kutha Yogyakarta ingkang saged majengaken kampung menika;
3. kangge panaliten sanes, panaliten menika namung winates kanthi kajian *morfologi saha semantik kemawon*, satemah taksih kathah ingkang saged dipunteliti saking nama – nama kampung wonten Kecamatan Kraton Kutha Yogyakarta kadosta bab sejarah saha *semantik kultural*.

KAPUSTAKAN

- Aminuddin. 2001. *Semantik Pengantar Studi Tentang Makna*. Bandung: Sinar Baru Algensindo.
- Antunsohono. 1953. *Paramasastra Djawa*. Yogyakarta: Hien Hoo Sing.
- Arifin, Zaenal & Junaiyah. 2008. *Morfologi Bentuk, Makna, Fungsi*. Jakarta : PT Grasindo.
- Chaer, Abdul. 1995. *Pengantar Semantik Bahasa Indonesia*. Jakarta : RINEKA CIPTA.
- Djadjasudarma, Fatimah. 1993. *Metode Linguistik Ancangan Metode Penelitian dan kajian*. Bandung : PT. ERESKO.
- Ariwardani, Enggar. 2016. *Analisis Morfosemantik Nama-Nama Pasar wonten ing Kabupaten Bantul Daerah Istimewa Yogyakarta*. Skripsi. Yogyakarta: Program Studi Bahasa Jawa, FBS UNY.
- Gudai, Darmansyah. 1989. *Semantik Beberapa Topik Utama*. Jakarta: Departemen Pendidikan dan Kebudayaan Direktorat Jendral Pendiakn Tinggi.
- Ismawati, Esti. 2012. *Metode Penelitian Bahasa dan Sastra*. Yogyakarta : Ombak.
- Mulyana. 2011. *Morfologi Bahasa Jawa*. Yogyakarta : Kanwa Publisher.
- Nurhayati, Endang. 2001. *Morfologi Bahasa Jawa*. Yogyakarta : UPT Yogyakarta.
- Pateda, Mansoer. 2010. *Semantik Leksikal*. Jakarta : RINEKA CIPTA.
- Pateda, Mansoer. 2011. *Linguistik Sebuah Pengantar*. Bandung : ANGKASA.
- Poerwadarminto, W. J. S. 1939. *Baoesastra Djawa*. GRONINGEN BATAVIA : J.B. WOLTERS" UITGEVERS- MAATSCHAPPIJ N. V.
- Ramlan. 2001. *Morfologi Suatu Tinjauan Deskriptif*. Yogyakarta : CV KARYONO.
- Sudaryanto, dkk. 1991. *Tata Basa Baku Bahasa Jawa*. Yogyakarta: Duta wacana University Press.
- Suhardi. 2013. *Pengantar Linguistik Umum*. Yogyakarta : AR-RUZZ Media,
- Tarigan, Henry Guntur. 1985. *Pengajaran Morfologi*. Bandung : ANGKASA.
- Tejo, M. W. 2016. *Analisis Morfo-Semantik Nama-Nama Dhemit ing Serat Kidungan Kawedhar Pupuh*

Asmaradana. Skripsi.
Yogyakarta: Program Studi
Bahasa Jawa, FBS UNY

Uhlenbeck, E.M. 1982. *Kajian
Morfologi Bahasa Jawa*.
Jakarta: Penerbit Djambatan.

Verhar, J.W.M. 1989. *Pengantar
Linguistik*. Yogyakarta:

Gajah Mada University
Prees.

Verhaar, J.W.M. 2001. *Asas-Asas
Linguistik Umum*. Yogyakarta
:Gajah Mada University
Press.